

## Aatsitassat Ikummatissallu

### Aatsitassanut ikummatissanullu allaffissorneq

#### Aatsitassanut ikummatissanullu pisortaqarfik

Aatsitassanut ikummatissanullu suliassaqarfik Inatsisartut inatsitsaat nr.7 decembari 2009-minngaanneersumit aatsitassat ingerlanneqartullu pillugit (aatsitassanut ikummatissanullu inatsit) malitsianik allannguuteqartumit naleqqussarneqarpoq. Inatsit 1. januaari 2010-mi atuutsinneqalerpoq taamaasillunilu Namminersorneq pillugu inatsit malillugu Kalaallit Nunaata suliassaqarfimmik angerlaassinera nalunaaqutserneqarluni.

2013 ukiakkut Naalakkersuisut uranimik aammalu aatsitassanik allanik ulorianartunik qinngornilinnik piiaanissamut naameerluinnarneq pillugu politikki atorunnaarsippaat, massakkullu Kalaallit Nunaat uranimut aammalu ulorianartunik qinngornilinnut allanut aatsitassarsiorinissamut aallartitsisinnaalerpoq.

Aatsitassanut Ikummatissanullu Naalakkersuisoqarfik aatsitassanut ikummatissanullu suliassaqarfimmi (uuliamut aatsitassanullu) inatsiseqarnermut aammalu pilersaarutitut ineriartortitsinermit, pilerisaarinernut taamatullu ujarassiorluni misissuinermit pilersitsiniarnernik suliagarpoq. Inuussutissarsiornermut, Suliffeqarnermut, Niuernermit Nukissiuuteqarnermullu Naalakkersuisoqarfik aatsitassanut ikummatissanullu suliassaqarfimmi suliffeqarnermut aammali inuussutissarsiornermi suliniutinut, innuttaasunik ilaatitsinermit, IBA-nik isumaqatigiissutinut (Impact Benefit Agreement, Kalaallit Nunaanni Namminersorlutik Oqartussat, kommunit pineqartut aammalu suliffeqarfiit qinnuteqartut akornanni suleqatigiinnissamut isumaqatigiissutit), inuiaqatigiinni aningaasaqarnikkut pissutsinut aammalu inuiaqatigiinni ataavartitsinermit nassuiaatinut (nassuiaatinik VSB-mik taaneqartunik) akisussaasuvoq.

Ujarassiornermit Immikkoortortaqarfik, Aatsitassanut Ikummatissanullu Naalakkersuisoqarfiup ataaniittoq, ujarassiornermi misissuinermi nalilersuutinik aammalu nassuiaatinik, pilerisaarinermut pilersaarusiormullu ineriartortitsinermi suliassanik tunniussaqaarluni suliagartarpoq.

Aatsitassanut Ikummatissanullu Aqutsisoqarfiup aatsitassarsiorsinnaanermut akuersissutinut, aqutsinermit aammalu ingerlatassanut akuersissutinut nakkutiginninneq suliaraa.

Aatsitassanik Suliassa qarfinnut Avatangiisinut Aqutsisoqarfik aaqjissuussinikkut Pinngortitamut Avatangiisinullu Naalackersuisoqarfiup ataaniittup aatsitassanut ikummatissanullu avatangiisinut nalilersuutinik, aalajangiinernik aammalu isummanik Naalackersuisunut suliassanik akisussaaffeqarpoq, taamaattumillu DCE-mut (Nationalt Center for Miljø og Energi, Århus Universitetip ataaniittumut) aammalu Pinngortitaleriffimmut (Kalaallit Nunaanni Pinngortitaleriffik) atassuteqarluni.

### **Isertitat**

Ukiup ataatsip ingerlanerani Kalaallit Nunaat aatsitassarsiornermi 75 mio.kr.-nit amerlanerusunit isertitaqarpat, naalagaaffiup Namminersorlutik Oqartussanut tapiissutai, isertitat 75 mio. kr.-t qaangersimappagit, isertitat affaannik annertussuseqartumik ilanngarneqassapput. Naalagaaffimmit tapiissutit nuulumut millineqarpata siunissami Kalaallit Nunaata Danmarkillu aningaasaqarnikkut atassuteqarnerat pillugu nutaanik isumaqatigiinniartoqassaaq.

### **Kalaallit Nunaata piginnittussaataitana**

Aatsitassanut ikummatissanullu inatsisip atulersinneqarnerani nunamut piginnittussaataitaneq Kalaallit Nunaata tiguaa, tassani aatsitassanut ikummatissanullu suliassa qarfimmi misissueqqaarnermut, misissuinernut atuisinnaanermullu akuersissutinut atulersitsineq aammalu allaffissorneq ilanngullugit.

### **Akuersissutit**

#### **Uuliamut aatsitassanullu misissuinerit**

Misissueqqaarnermut, misissuinernut aammalu atuisinnaanernut akuersissutinik Naalackersuisut tunisisinnaapput, atuisinnaanermullu akuersissutit taamaallaat ingerlatseqatigiiffinnut Kalaallit Nunaanniittunut tunniunneqartarput. Ingerlatseqatigiiffiit qinnuteqaatini pisarialimmik suliamut ilisimaarinninnertik atuisinnaasutullu suliffeqarfiup aningaasaqarnikkut tunuliaqutaat uppersarsassavaat.

Akuersissut kalaallinik sulisoqarnissamut imaluunniit atortussanik pilersuisumik atuinissamut pisussaataitaneq imaqarsinnaavoq, aammalu aatsitassat ikummatissallu atorneqartut Kalaallit Nunaanni suliareqqaarneqarnissaannik aalajangiinernik imaqarsinnaalluni. Atuisinnaanerup aallartinninnerani atuinissamut pilersaarummik Naalackersuisunit akuerineqartussamik saqqummiussisoqassaaq.

Akuersissummi Naalackersuisut atorneqarsinnaasup annertussaa pillugu piumasqaatinik aalajangiissapput. Nukissiornermi ruujorillu ingerlaarfiinik sananermi pilersitsineq ingerlatsinerlu aamma akuersissutigineqassapput. Namminersorlutik Oqartussat piginnittussaataitaa sumut akileeqqusisinnaavoq.

Uuliamut misissuinissamut atuisinnaanermullu akuersissut ukiunut qulinut imaluunniit immikkut pisoqartillugu ukiunut 16-inut tunniunneqarsinnaavoq.

Akuersissutit periaatsit assigiinngitsut malillugit tunniunneqartarput assersuutigalugu tamanut ammasumik tuniniaanermi, uuliamik ingerlatseqatigiiffiit qinnuteqaatini suliamut ilisimaarinninnermik, aningaasaqarnikkut tunuliaqutamik aammalu isumannaallisaaneq, peqqinnissaq avatangiiserlu pillugit ingerlatseriaatsinut paasissutissanik tunniussiffiginnaasaannik.

### **Annikitsumik piiaanissamut akuersissutit**

Aatsitassanut annikitsumik misissuinissamut atuisinnaanermullu akuersissutit inuinnarnut ingerlatseqatigiiffiunngitsunut tunniunneqartarput. Akuersissutillu taamaallaat inunnut Kalaallit Nunaanni najugaqavissunut aammalu qinnuteqannginnermi ukiut tallimat najugaqareersimasunut piffissamilu tassani tamakkiisumik akileraartarsimasunut tunniunneqartarput.

Annikitsumik piiaanissamut akuersissutit assigiinngitsut marluupput, kisermaassilluni annikitsumik piaaneq aammalu kisermaassinertaqanngitsumik piiaaneq. Akuersissummik tunineqarnermi nunaminertami sumiiffik aalajangersimasoq 1 km<sup>2</sup>-itut annertutigisoq akuersissutigineqartarpoq, aammalu annerpaamik piffissami ukiunit pingasunik sivissuseqartumi tunniunneqartarluni. Kisermaassilluni annikitsumik piiaanissamut akuersissut nunaminertami Aatsitassanut Ikummatissanullu Aqutsisoqarfimmit akuersissutigineqarsimasumi ujaqqanik katersanik piiakkanillu atuisinnaanermik periarfissiivoq. Inunnit qulingiluanik sulisoqarsinnaanermik akuersissummik qinnuteqartoqarsinnaavoq akuersissullu sivitsorneqarsinnaalluni aningaasarsiutaasinnaasumik nassaartoqarsimappat. Akuersissut annerpaamik ukiuni 30-ni atuussinnaavoq.

Annikitsumik piiaanissamut akuersissutit kisermaassinertaqanngitsut kommunini sisamani sakkut tigoriaannaat atorlugit ujaqqanik pinneraasiassanik aatsitassanillu katersinissamut periarfissiippat. Akuersissut ukiuni pingasuni aamma atuutsinneqarpoq sivitsorneqarsinnaananilu, atorunnaarneranili akuersissummik nutaamik qinnuteqartoqarsinnaavoq.

Annikitsumik piiaanissamut akuersissut atorlugu ukiumut aatsitassat 100.000 kr.-t sinnerlugit nalingannut akileraarutaasussatut tuniniarneqarsinnaapput.

Annikitsumik piiaanissamut akuersissuteqanngitsut Kalaallit Nunaanni najugaqavissut aammalu tamakkiisumik akileraartartut maskiinanit atortussiat qartiterutillu atornagit sumiiffinni inunnit aatsitassarsiornermilu ingerlatseqatigiiffinnit kisermaassiffiunngitsuni ujaqqanik tigoriaannarnik aatsitassanillu katersinnaapput, kisiannili diamantiunngitsunik, aligoq aappaluttuunngitsunik, safiriinngitsunik, smaragdiinngitsunik, chrysoberyliinnigtsunik aammalu opaliunngitsunik. Avammulli tunisisinnaanermut akuersissummik qinnuteqartoqassaaq annikitsumillu piiaanissamut akuersissuteqanngitsut aatsitassanik 100.000 kr.-t nalingannut Akileraartarnermut Aqutsisoqarfimmut nalunaarutigineqartussanik tuniniaasinnaapput.

Uuliamut aatsitassanullu misissuinerit aningaasallu taakkununga atorneqartut amerlassusaat aammalu annikitsumik piaanissamut akuersissutit amerlassusaat ataani takuneqarsinnaapput.

### Takussutissaq 1. Kalaallit Nunaanni uuliamik misissuinerit

	2000	2001	2002	2003	2004	2005	2006	2007	2008	2009	2010	2011	2012	2013	2014	2015	2016
Misissueqqaar-nerit (ingerlasut)	.	.	4	7	9	9	7	11	17	23	27	25	27	18	20	16	16
Misissuinissamut akuersissutit (atulersitat)	.	.	1	1	1	2	2	6	11	13	20	20	20	22	23	18	16
Misissuinissamut aningaasartuutit USD millioninut	.	.	0,9	2,4	2,9	2,9	1,9	9,5	115,5	102,0	501,7	823,9	219,8	106,4	26,8	64,1	...

Najoqqutaq: Aatsitassanut Ikummatissanullu Aqutsisoqarfik

### Takussutissaq 2. Kalaallit Nunaanni aatsitassanik misissuinerit

	2000	2001	2002	2003	2004	2005	2006	2007	2008	2009	2010	2011	2012	2013	2014	2015	2016
Misissueqqaar-nerit (ingerlasut)	15	6	6	11	12	12	12	14	14	11	21	25	25	22	17	17	11
Misissuinissamut akuersissutit (atulersitat)	24	19	17	19	22	33	29	63	67	71	73	77	79	76	67	70	56
Atuisinnaaner-mut akuersissutit (atulersitat)	.	.	.	1	1	2	2	2	3	4	4	4	4	5	6	6	7
Misissuinissamut aningaasartuutit DKK millioninut	103,4	111,8	20,8	44,9	66,2	191,0	135,0	471,0	497,0	300,0	522,3	711,3	518,9	305,7	235,8	167,6	...

Najoqqutaq: Aatsitassanut Ikummatissanullu Aqutsisoqarfik

### Takussutissaq 3. Akuerisat annertunngitsumik suliaqartussat

	2000	2001	2002	2003	2004	2005	2006	2007	2008	2009	2010	2011	2012	2013	2014	2015	2016
Akuersissutit (atulersitat)	.	.	.	.	.	.	.	.	.	1	6	8	12	12	26	42	44

Najoqqutaq: Aatsitassanut Ikummatissanullu Aqutsisoqarfik

Atuisinnaanermut akuersissutini pineqarput saviminisiorfik Isukasia Kalaallit Nunaata kujataaniittoq, molybdænisiorfik Malmbjerg Kalaallit Nunaata kangianiittoq, platinisiorfiullunilu aamma kuultisiorfik Skærgaard aamma Kalaallit Nunaata kangianiittoq, niobiummisiorfiulluni aamma tantalisiorfik Motzfeldt SØ Kalaallit Nunaata kujataaniittoq, Killavaat Alannguat tantalinik niobiumminik aammalu zircoiminik nassaassaartoq aammalu Kuannersuit ujaqqanik qaqutigoortunik uranimik, zinkimik flourimillu nassaassalik.

#### Kommunit aammalu betonngiliorfiit

Naalakkersuisut kommuninut, betonngiliorfinnut aammalu siorartaajaasunut sioqqanik, ujaraaqqanik, ujaqqanik assigisaannillu aqquserniornermi aammalu sanaartornermi atortussanik atuisinnaanermut akuersissummik

peqaqqaarani katersisinnaanermut piaasinnaanermullu akuersissuteqarsinnaapput.

## **Aningaasaqarneq**

### **Aningaasaqarneq**

Kalaallit Nunaat uuliamut aatsitassanullu ingerlatseqatigiiffinnut orniginartuutinniarlugu aningaasaqarnikkut sakkunik assigiinngitsunik suliaqartoqartarpoq, soorlu ingerlatseqatigiiffimmu aammalu iluanaarutinut akileraarutit, tunisassiornermi aammalu sinneqartoormi loyalty (tatiginassutsimut akileraarut), naalagaaffimmit peqataaneq/sinneqartoortinik avitsineq/tunisassiornermi avitsineq aammalu sulinermi sungiusarnermilu pisussaatitaanerit. Kalaallit Nunaanni qaffasissuseq uuliasiornermi aatsitassarsiornermilu soqutiginarpoq nassaariniallugu PriceWaterhouseCoopers suleqatigalungu nunani assigiinngitsuni piunasaqaatinut sanilliussisoqarnikuuvoq.

## **Ingerlatanik unitsitsinermi**

### **Ingerlatanik unitsitsinermi**

Aatsitassarsiornermi ikummatissiornermilu ingerlatat unitsinneqarniarpata, piginnittussaatitaasoq atortunik piiaalluni matusissaq taamatullu sumiiffimmi ingerlatsiffiusimasumi torersaassissalluni. Taamatuttaaq piginnittussaatitaasup matusinerup kingorna avatangiisinut nakkutilliisoqarnissaa isumannaassavaa. Naalakkersuisut piginnittussaatitaasup isumannaatsunik matusinissaa aammalu sumiiffimmi avatangiisinut nakkutilliisoqarnissaanut suliaannagortitsinissaa piunasaqaatigaat.

Inatsit malillugu suliffeqarfiit aatsitassarsiornermi aallartitserusuttut mingutsitsinissamut navianartorsiornermi killilersimaarinnissapput, aammalu atortussianut mingutsitsinut piiaanissamut periarfissanik innimiginnissallutik. Inatsittaaq silaannarmut pinngortitamullu illersuinissamut aalajangersakkanik imaqarpoq.

Avatangiisit sunnerlugaanissaannut navianartorsiornermi akisussaasup tamanna pitsaaliornissaa ujartussavaa Naalakkersuisullu navianartorsiornermik ilisimatissallugit. Akisussaasorlu pisussaatitaavoq ajutoorsimanermi taarsiissuteqassalluni.

Uuliamik aatsitassanillu nassaassanik atuisinnaaneq, nunap ataanik nukissiuutinullu isumalluutinik atuineq, aatsitassarsiornermi atortunik annertunerusunik sananeq aammalu assigisaanik atortunik ingerlatsinermit unitsitsineq taamaallaat pisinnaavoq avatangiisinut sunniutinik

nalilersuisoqarnerani, aammalu tassunga nassuiaat (VVM-imik nassuiaammik taaneqartoq) Naalakkersuisunit akuerineqarpat.

## Inuiaqatigiinni ataavartitsineq

### Inuiaqatigiinni ataavartitsineq

Aatsitassanut ikummatissanullu inatsisip piumasaraa aatsitassarsiornerit inuiaqatigiinnut pingaaruteqartumik sunnuteqarsimappata inuiaqatigiinni ataavartitsinermik nassuiaammik (VSB-mik nassuiaat) Naalakkersuisunit akuerineqartussamik suliaqartoqarnissaa.

Taamaattumik VSB off-shoremik qinnuteqartunut aammalu 2010-mi 2011-milu uuliasiornermi programminut suliarineqarput, tamannalu tunuliaqutaralugu aamma Namminersorlutik Oqartussat, kommunit aammalu Cairn Energy suleqatigiinnissamik isumaqatigiissuteqarput.

Taamatuttaa Isukasiani saviminisiorfimmut, Qeqertarsuatsiaani aligoq aappaluttusiorfimmut, Killavaat Alannguanni eudialytisiorfimmut, Qaqortorsuarmi anorthorsitisiorfimmut aammalu Citronen Fjord-imi zinkisiorfimmut aqerlusiorfimmullu VSB-mik nassuiaatinik suliaqartoqarpoq. VSB-mik nassuiaatit atuisinnaanermut qinnuteqarnerni tamarmik tusarniaavineqarput aammalu kingorna ingerlatseqatigiiffiillu IBA-mik (Impact Benefit Agreement) isumaqatiginninniarnerni tunuliaqutarineqarlutik.

Aatsitassalerinermik Ilinniarfik Sisimiuniittoq aatsitassalerinermi ilinniartitaanermut piginnaasanullu sulianut ingerlatsisoq 2010-mi ukiakkut piareerneqarpoq.

### Nittartakkat

Aatsitassanut Ikummatissanullu Aqutsisoqarfik: [www.govmin.gl](http://www.govmin.gl)

---

Ilisarnaatinut nassuiaatit  
... Paasissutissat pigineqanngillat  
.. Paasissutissat tatiginanngitsut ilisarinnilersitsisinnaasulluunniit  
. Kisitsisitaqarsinnaanngitsut  
0 Affaanit mikinerusut  
- Nul  
\* Kisitsisaagallartut imaluunniit missingersuut

Saaffiginniffissaq

E-mail: [stat@stat.gl](mailto:stat@stat.gl)

2017 ukiumoortumik paasissutissat

Grønlands Statistik  
Postboks 1025 · 3900 Nuuk  
Tlf.: +299 34 57 70 · Fax: +299 34 57 90  
[www.stat.gl](http://www.stat.gl) · e-mail: [stat@stat.gl](mailto:stat@stat.gl)

